

Բայց ես կարո՞ղ էի ներել նրանց, որ այնպես անվայելուչ կերպով խօսում էին Մարտի մասին...: Այսպիսի խառն մտածմունքներով լցոած էր իմ յիմար գլուխը, երբ ես կրկին դարձայ տաղաւարի մօտ եւ պառկեցի նրանցից փոքր-ինչ հեռու խոտերի վրայ:

Ետ ընկած լուսինը կամաց-կամաց վեր բարձրացաւ սարի ետեւից եւ լեռները լցոեցան արծաթի լուսով: Գեղեցիկ տեսարանը ամենեւին չազդեց իմ վրայ: Իմ գլուխը դեռ լիքն էր սեւ մտածմունքներով. իմ սիրտը դեռ անհանգիստ խռովութեան մէջ էր: Չգիտեմ, ինչո՞ւ այնպես վրդովոած էի ես. չգիտեմ ի՞նչ էր, որ այնպես տանջում էր ինձ: Միայն այսքան եմ յիշում, որ շուտով իմ աչքերը լցոեցան ջերմ արտասուքով, ես սկսեցի լաց լինել, երկա՛ր լաց լինել...

Գիշերն ես անցուցի տենդային ջերմութեան մէջ: Առաւօտեան լուսաբացի պահուն ինձ տիրեց մի թմրութիւն. այն ժամանակ եւս խառն երազները սկսեցին անհանգիստ անել: Ողորմա՛ծ աստուած, ինչե՛ր չէին գնում եւ գալիս իմ աչքերի առջեւ, — սատանաներ, հրեշտակներ, դժոխք, արքայութիւն, — մի խօսքով, հարիւրաւոր տխուր եւ ուրախալի պատմութիւններ, մի-նը միւսից յետոյ կամ զոարճացնում էին ինձ եւ կամ սարսափեցնում...: Բայց երբ զարթեցայ, բոլորը մոռացայ, մի երազ միայն մնացել էր իմ մտքում, նրան յիշում եմ եւ այսօր:

Ինձ երեւում էր, թէ Սօլայի հեղեղատը յորդացել էր, որպէս ամէն տարի, գարնան ժամանակ բարձրանում էին նրա ջրերը: Իսկ այժմ շատ էր բազմացել ջուրը, խիստ շատ: Կատաղած գետը գոռում էր, փրփրում էր, եւ հսկայական վիշապի նման սարսափելի պտոյտներ էր գործում: Նրա պղտոր յորձանքները տանում էին իրանց հետ ամենը, ինչ որ հանդիպում էր: Ես տեսնում էի՝ թէ ինչպե՛ս ալիքների մէջ լող էին տալիս տնային կարասիք, տեսնում էի խեղդոած մարդերի դիակներ, այլեւ երեխաները, կապած օրօրոցների մէջ... Մտածում էի՝ որքա՛ն տներ պետք է քանդած լինի, որքա՛ն ընտանիքներ պետք է ոչնչացած լինի սարսափելի հեղեղատը... Անբախտ զոհերն երբեմն բարձրանում էին ալիքների հետ, երբեմն կորչում էին նրա պտոյտների մէջ. երբեմն մօտենում էին գետի եզերքին. — ձեռքդ մեկնե՛իր եւ ահա՛ կ'ազատես, մտածում էի ես:

Ես տեսնում էի՝ Կարօյին, Ասլանին եւ Սազօյին, նրանք այնպէս փոքրիկներ էին, որպէս առաջ, երբ դեռ երեխայ էին, երբ հեղեղատի ջուրը նստելու ժամանակը գնում էինք միասին նրա ափերից հաւաքում էինք զանազան հնութիւններ, որոնց նա բերել էր իր հետ, քանդելով Քօհնա-Շհարի ակերակները: Իսկ այն երազ չէր: